

清容居士集

三

蘇子知
好學

PDG

清容居士集卷第四

古詩 五言

夕佳亭

赤雲下平田層巒紫光凝
踈鐘息萬籟晴湖淨奩冰
倦翮戢已棲遊雲澹相承
吹簫者誰子空林起孤燈
感彼金谷人怪石樛寒藤
壯意耻未沒水涵風憑陵
亭亭玉浮圖百幻隨廢興
振衣視天末黯澹銀河升
朝曛詎異境氣寂念始澄

贈養源編脩回嚴陵省墓

岌岌白雲阡翳翳青松居美蔭同靈根地
易世愈踈清秋子胥濤縈紆達桐廬欲濟
非無航契闊實跂予昔聞祖父言結綬來
京都束書遠鄉國井邑匪異殊俯仰成雲
仍宰木今何如事遠遺謀存審象窺眉鬚
寒暑有代謝念昔同一初躬耕樂真隱漫
仕脩素儒敦叙古所宗和侃寧有渝

贈昌上人二首

蕭蕭湖上波搖蕩群峰秋客有萬古意支
筇赴龍湫龍湫尾眉叟宴坐足未收飲以

一片冰熟視了不酬長松挂枯瓢風靜林
颼颼境足念念愈忘道充身益優永謝巖下
人深省聊自脩

岩堯蒼玉軒虛聲振寒林我昔行其庭見
影復見心秀嶂出古色浮雲為之陰豈不
念世短所樂非所歆潛珎閔幽躋群弄誇
姝音靖言事當爾江湖眇崎崕送子歸山
阿松風起寒琴

宿竹院次珙橫川韻二首

脩竹手所種參差過屋山微風為之來心

境兩相閑清泉在澗底白雲在松間鐘聲
集趺坐樓深流月殘重遊啓深省解轡思
掩關

昔遊玉几峰老禪肩如山機深削陳迹天
馬初服閑念欲從之遊小築茅三間俛仰
二十載黃塵鬚毛殘亭亭石塔影哀猿守
松關

送宋壽卿侍御迎養建康

葆真林間下為善心自娛農圃得休息時
讀古人書施食不望報折券不顧餘時至

祿自臻門有駟馬車念昔髫鬣子遶床衣
青襦束髮事編簡操觚入皇都勁氣摩黃
鵠危言伏青蒲尾眉笑有言鄰曲驚且吁
維南帝王州問俗宣典謨匪規鼎食榮菽
水心晏如種德報已豐願言廣留畬蘭生
在堂下深根佇扶疎

廣信陳氏擇勝樓

散髮碧潭際讀書叢竹邊怡情學榮觀卜
筮遵自然雲蘿左右嶂雞犬東西阡群動
各有性孰念靜者憐翳翳昔賢居遺迹故

老傳化為神僊宅喬木昧蒼煙松風起萬
壑哀湍助鳴絃觀萬詎在遠泯默師韋編

潘孟陽上書不報歸里作五詠

賈生蘊竒略徒步西上書昊天有正命傷
哉杞人愚鵬翼垂雲來魂氣與之俱鼂氏
竟寂寂主父復何如

襄陽孟處士拂衣歸故山放浪巖壑深流
詠遺人間舉袖巖花落擊楫江鷗還羊公
何墮淚水聲日潺潺

梅生一尉卑喋喋正天紀洗心洞玄化削

跡棄妻子龍變孰能馴蟬蛻迺真止松迴
風泠泠水落石齒齒

虞卿舌轉九揣事精微芒事危見交態窮
愁名益光黃金散逝水白壁凝飛霜丈夫
有定志得失非預防

仲連匡世姿揮手却秦軍掩袂停白日登
車抗浮雲射書誠草草孤城生死分辭榮
敦薄俗矯抗離其群

題盧溝煙雨圖

為吳成季作

驅馬上河梁圓暈新雨紋矯首層闕巍翔

鸞散奇氛倚南雙松樹百里風聲聞束髮
入紫京去任心如焚送客酬我觴我酬不
得醺願化為黃鶴朝夕隨飛雲上以奉明
主中以承嚴君徃復三千年奇齡合氤氲
結袂安期子啓齒歌瓊文

滑州從事持喪三年將終養其母
郡表其閭

東魯秉周禮化俗何簡嫺崎嶇小滕君冠
蓋交道周漢帝仁且明遺令誠咍嚶駟馬
不及舌坐貽千古羞濫觴始膚寸奔流淪

九州昂昂古先進免胄希前脩青松為之
枯慈烏為之留念此歲月短解紱安林丘
華楹表槐柳細石寒泉流泯默區中人章
甫慙沐猴

孟和卿旌表

濯纓息機事枕石聽流泉感彼蟻慕人駢
首爭遺羶黃雲翳平壑持以防歲年河流
滔天來積浪翻中田招携舊鄰曲寒林起
炊煙冥報非我願表宅增惘然紛紛游俠
徒黃金生愛憐原生處蓬戶屢空聊自全

雲中郝孝子

混沌鑿既久重華以孝稱悲哉短喪徒稻
錦顏益矜詩禮行中州衆說交沸騰挽十
不得一閉閣徒凌兢芒芒古雲中土屋塗
層冰下有郝氏阡馴鳥為之增大圭出至
璞匪以雕績能寒泉冽古井零露溥蒼藤
淳風詎云遠相傳在雲仍

送沙君寶宰邑

舊為翰
苑印史

尚印宰百里寒厓水粼粼野曠牛羊低山
深麋鹿馴持觴接耆老種柳迎行人陶然

樂清淨絃歌足青春

次韻馬伯庸供奉書館書事二首

瑤臺麗層雲秋聲起琪樹織翠藻井波凝
碧瑣窻霧雍容列僊集晴雪烟振鷺念昔
經啓初擲沐合生聚簡冊迄未成春秋奉
神御巍巍冠函夏握筆慙繪句玄尊實明
水越席敷大路崔蔡心匪迂終焉才名誤

其二

神京奉載筆需雲歌肆筵匪謂歲月虛聖
代深養賢微踪愧三入取禾踰十千馳神

竹素圃鴻藻儼古先群雄寶書聚彌綸迺
成編微言耿玉絜潛光媚春妍往聖去已
久八音盪敷宣元運合豹變高閎踵蟬聯
夷齊迺首傳冥思豈其然

送馬伯庸御史奉使河西

青瑣倦迂散執轡踰關河黃流何奔傾積
石何嵯峨承詔撫疲氓驚鳥在林柯沙
場有凍骨野畝無遺禾日夕寒雲聚宿憐
明巖阿訪俗感素心因之聆詠歌
詠歌者誰子被髮號天明婦死不復悲失

兒誰與耕承平五十載不識戰與爭殘雪
流銀液我淚同其傾古云百二險夸誕生
甲兵孰能轉夷途歷劫永清寧

清寧闡文運覽彼古帝都秦聲激豪宕洛
詠夸敷腴邛山何纍纍下有白玉趺感彼
秉筆人百金盡其諛死者已寂歷茲文亦
模糊偉哉龍門生悲憤有遺書

遺書紀河源荒忽不可識君行河之西春
雪深五尺茫茫賀蘭山抽矢石為鏑坐閱
三姓王聖代始歛色沙羊護氈房名駝候

土驛觀風慘無儔雲端羨飛翼

飛翼西北來遺我書赫蹠中有陳情詞復
憐雙雛啼野曠川無梁積荒氣候淒雞鳴
葡萄根虎嘯首霜畦清霜集素裘斗戴天
益低頓轡不得上雪山在其西

其西何寥寥云有古先生巖居時一食委
形澹無營朝日炫丹碧匪以斤斧成如何
驕榮子騰駟列層城驅力超北海逐影徙
南溟誰能佐玄化泯默有遺情

遺情在相思舉酒不得起永念編簡功篤

志刊綺靡傾蓋已云舊知我實知己送君
河之湄凍柳光疑疑脩途馬飛翻少立盡
瞻俟植德綏令名眠食慎道里

道里吾何能託身承明廬栽冠養深拙清
塵避脩途驅馬李陵臺望鄉問長鬚長鬚
不能對吾行益次且羨君萬里道晴霞起
襜褕天山諒非遠椎牛植粉榆

月巖

峻壁飛鳥絕積鐵成臺隍感彼玉兔精皎
皎芙蓉床萬古消晦冥六月生陰涼道人

悟空幻趺坐鬚眉蒼觀境不以色湛寂回
真光成虧衆妄集嘉名表其常松聲起萬
籟朝陽曙扶桑

夜集西太一宮分韻得草字

晝寂白雲深聯鑪集瀛島南枝當戶生積
素流羽葆孤鐘息羣動獨鶴候清早石枰
松影侵持觴俗塵掃春風散琪樹頃刻光
灑灑玄談發嘉獎夙昔恣傾倒偶爾同心
期還山寄瑤草

史氏報春堂